


MURWE, MUKITTHARE

 Ahe, nnari, eyo yaari Becky ahinatthi oyariwa. Nto siiso miyo—miyo khuupuwela, “Ahe, moosuwela. . .” Miyo—miyo kinlya muhasa mmosa paahi wa aveeya, onkhala isentavo muloko. Ahe, miyo paahi. . . Kaavahiwa ettikitti aka, khulepa paahi, moone, ni miyo kaaniliva, khuhokoloxa, vano n’uhela ehisapo aya, ’okhala wira kaahikhalana ekontha ya soothuma.

² Nto nihiku nimosa okathi waarin’ahu mu—muthukumano w’alipa-ooweettelela. “Wulu,” awo khwira, “ti pani mulol’ola ohenle ehisapo etthu ntoko ele?” Munnona? Ma—mahooolela, moosuwela, “Isentavo muloko sa yolya voosiisu?” Vano eyo enkhala ntoko yookhweyaxa w’atthu awo akina, moosuwela. Akina aya yaahela esisapo ya etoolare emosa, moone; itoolare piili wa yolya y’ohiyu. Nto miyo kaahela siiso yaary’aya.

³ Ahe, miyo khwira, “Ahe, vano, khivantthuneya miyo ohela esisapo. Kaarowa wira exeeni vaakhanle wira kinlya paahi, isentavo muluko?”

⁴ Mwenye Fields, yoowo aari mukhaliherya a mukhulupale, owo khwira, “Billy, muhele etoolare emosa, mano, khula enamuna.” Khwira, “Ti yeeyo akina ale aniir’aya.” Khwira, “Muhaana opweha eyo vamosa.”

⁵ “Ahe,” miyo khwira, “Miyo—miyo nkinalyeeke ovikana muhasa mmosa wa aveeya, nto ti yeeyo kinlokihaaka.”

Khwira, “Oh, muhi, muhiire-tho siiso.”

⁶ Ahe, nto miyo khuupuwela, “Kinrowa wira exeeni ni yeeyo?” Nto miyo khuvekela isentavo miloko mithanu wa olya voosiisu. Vano kinkuxa isentavo miloko mixexe ya yeeyo, katthuna vale opakela etthu p’itthu, waavaha anamwane kamosa-kamosa mphironi; anamwane kamosa-kamosa, moosuwela, yaakhala ntoko wira yaaniphavela esanti yaamukhaani, esanti, nave. Ahe, khuupuwela wira khino miyo pooti. . . Khweeli, eyo yaari ekupaniya, eneene, yaalavula ni miyo siiso. Owo aari mulopwana mmosa aakhumme mukupaniya.

Tivo, miyo khuupuwela, “Khino kiihira etthu ehilonke.”

⁷ Vano nno woohikhala khalayi, ni mulopwana mmosa namweettelela. . . Vano awo aneettelela ni maalikoopiteru, moone. Vano owo khurwa khweemela. Owo khwira, “Heyi, Munna Branham,” khwira, “mwiri ula onimunnuwa.”

Miyo khwira, “Ayo.” Miyo khwira, “Anamwane anthweela vathi va mwiri yoole vale.”

Owo khwira, “Ninoowerya ovakulela?”

Miyo khwira, “Ayo, masi muhuuhe. Munnona?”

Owo khwira, “Ahe, naatthuna wuuha. Nnimoolivani mwaha wa yoowo.”

⁸ Miyo khwira, “Nnari. Nnari. Nkintthuna wira muuhe.” Ahe, kinnisuwela malamulo a ehaakhi ya epecerelo ovira, nave, moosuwela, ’okhala wira kaari mwa yeeyo iyaakha thanu na piili. Miyo khwira, “Nnari.” Miyo khwira, “Nkintthuna wira wuuhiwe, masi pooti ovakulela.” Miyo khwira, “Miyo—miyo kinkhaliha woovakuleliwa, masi,” miyo khwira, “pooti. Pooti ovakulela mwatthuna vale.” Miyo khwira, “Miyo, Munna Wood ni miyo, nintthuna ovakulela. Ninoovakulela sothene iya sikina siri nno.” Nto miyo khwira, “Masi naatthuna nihiye ole vale mwaha w’anamwane, Joe n’akina, moosuwela, axinamwane anthweela vathi va mwiri ule.”

⁹ Miyo khurowa khweetta mukwaha. Okathi ohokolonw’aka, waahiikitthiwa ni sarothi khukumihwa-vo. Oh, eyo yaarowa okhala elamulelo xeeni mukupaniya, moone, mwaha wo wiikitthi mwiri ule, moone. Nto siiso miyo khuupuwela, “Vano,” miyo khwira, “Pwiya, miyo hata nkinrowa ohimya eyo.” Munnona? “Sinto yookhala etthu miyo—miyo, wa yeeyo, imaara sikina kihelalaka esisapo, kilyaaka paahi yoophiyerya isentavo muloko, ni okhala oohela ‘isentavo miloko mithanu.” Munnona? Miyo khwira, “Yakhala etthu mwaha wa yeeyo, muhiye eliverye, moone, wira—wira miyo—wira miyo kihelale, moone. Wira miyo. . .” Nto koohiya oloha sa okhala Mukupaniya wa Miteko s’Anamunceene nto, moone, ’okhala wira siiso yaakhanle etthu ottuli iwe.

Nihaana oweha saana etthu eniir’ahu. Nihaana okumanana nihiku nimosa.

¹⁰ Anamwane, erwaaka va. Ame anyu yaari wu, nihiku nlo, Trudy. Kinoona wira nyuwo khimwa, khimwaasuwela. Ela ennitutuxa vakhani, kinniwerya wona. Ni nyuwo muhanle omaliherya osoma. Ni naahikhalana mukwah’ola nno vamosa. Kinoorowa vamuthukumanoni vano, naanaanoru nuumala muthukuman’ola. Nto ninrowa orowa owaani.

¹¹ Miyo kuupuwela wira waarowa okhala okathi wooreerela olavula ni nyuwo othene, vano nto kaahuupuwela nave-tho wira yaamurowa okhala yooreera olavula n’anamwane okathi vakhani paahi muhinatthi omaliherya wanyu osoma. Osoma eversiikulu emosa ya Bibilia, ni olavula ni nyuwo paahi okhuma mmurimani mwaka, minuutu soophiyaka muloko. Kinookhuma ephiro anyu. Munnona?

¹² Kihinatthi olavula n’anamwane, kaatthuna paahi kilavule n’alweene minuutu mmosa paahi, nave, othene anyu. Naanaano, alakela, khino onkhalaka, mukwaha woolipa. Masi musuwelelo kiixuttaly’aka wa Muluku, nkaarowa okuxa itoolare ikonto muloko mwaha w’etthu kiixuttaly’aka w’Apwiya okhuma okathi ory’aka wenno. Vekeekhai kinnaamini wira kirwiye mwa

wiwelela woomalela yooruma ya Muwerya sothene, ni miyo—miyo kinwehererya wira nkikhanle-tho okhalaka siisaale. Ni yookhala e . . .

¹³ Kirwaaka, etthu emosa, yaari ni yoowoona, wira kaaphwanyaneya osulu oTucson nno okathi e—e—erumelo emosa yiiraneiy'aya. Ahe, Munna Fred aari weiwe okathi yiiraneiy'aya. Nto awo aakumiha elatarato eyo vano, moosuwela, osulu. Nto miyo nkuupuwelelaxa yeeyo, nkaatonko oweha. Vano eyo khupacerya okithananiha mwa enamuna emosa, nihiku nlo. Nto Munna Norman, tiithi awe Norman va, khukileela, khwira, “Mooweha ela?”

¹⁴ Vano kiwehakaruru, vaavale vale yaahikhala Malaikha ale voowooneyaxa ntoko saaweryaney'aya okhala, ary'ene vaavale vale valataratoni vale. Munnona? Miyo khuweha wira koone yaari silini, nto waari okathi, yoowo, voophiyaka nihiku nimosa wala maili ottuli, wala nihiku nimosa wala maili kaamanly'aka okhala osulu iwe. Miyo khuweha vatthu vaary'aya. “Epantte enkela epheyo y'oFlagstaff, ahiiso Prescott, okhanle ohitto w'oFlagstaff.” Ahe, ti weiwo tu waary'ahu-wo, moone, vekeekhaii.

¹⁵ “Ikilomo miloko mixexe ni piili osulu.” Vano, nikupetthe khaninwerya orowa ovikana—ovikana xexe, ikilomo thanu na mosa osulu, wala thanu, mukururu, khula enamuna ya etthapwe wala etthu p'itthu, moone. Matteeke anvava ikonto muloko ni thanu na xexe. Eyo wira evavele osulu ovikana meeku othene, moone. Nto ikonto muloko ni thanu na xexe siri ntoko ikilomo thanu na mosa osulu. Iya ikilomo miloko mixexe ni piili osulu, ni ikilomo miloko mixexe ni thanu na tthaaru orakama waya, vano ni mukhalelo w'epiraamite, vakhala wira mooweha elatarato ene.

¹⁶ Nto epantte ya moonoo woolopwana, ntoko soohimenry'akani, kaahiweha, voowooneya saana, Nlaikha nle. Nlo nri vo, etthirima vate, mapupha ottuli, nivolowaka naanaanoru, siiso ntoko yaary'aya. Nkaatonko oweha okathi Awo yaapaceny'aya . . . Sookhala itthu sinci-enexa.

¹⁷ Kikhuruwelaka paahi ephiro nihiku nlo, yaahikhala etthu emosa yaakhumelenle yaalavunle ni miyo mwaha w'etthu miyo—miyo kaarin'aka wira. Ni kuhiyo—kuhiyo mutthak'aka.

¹⁸ Emaara emosa, Leo Mercier aahihimya, khwira, “Munna Branham, okathi onimoorwa nuumala yeela,” khwira, iyaakha soophiyaka thanu wala thanu na mosa sivinre, khino thanu na piili, khwira, “Apwiya anoorowa orukunxa muteko anyu, Munna Branham.” Ni khwira, “Awo yaira vale, alakela munrowa othataanaka muxipiritaalini paahi, ni waaleela okhuma m'o—m'olilini ni itthu siiso.” Khayiiweiye oratteene, kinamwi kaaminiki wira Munna Leo aathuna okhala naxariya wa yeeyo.

¹⁹ Masi khayiweiye oratteene tu, okhala wira, moone, Pwiy'ahu Yesu khanatoko wira yeeyo. Munnona? Ni Owo aahrowa oxipiritaali. Aari mmosa paahi oxipiritaali iwe. Munnuupuwela nipuro naary'aya mBibiliani? Ntthiya n'oPetesta. Mittitthi minci-ene s'atthu saarupaathi weiwo, oorakala, ootuthunya, oohoona, oottotorowa, elipelelaka Nlaikha. Vano, eyo yaari muxipiritaali ya erooho weiwo atthu yaalipelel'aya ovoniha wa Muluku. Nto va Mpenuxa a Muluku Ene khurwa khunvoniha mmosa khweetta arowaka. Vano khivaakhanle onwehererya mutthu onookhwa, wala muteko orwa, waarowa okhala muulupalexa ovikana waary'aya ole. Munnona? Nkaakhanle okupaliki yeeyo.

²⁰ Masi vapaceny'aka orukunuwa, Eroho Yowarya khukirweela. Miyo khunvekela Leo ekaneta. Kaahikhalana epaphelo yaamukhaani, vano miyo khulepa. Eri mutrelani mwawe olelo, mwahalaru okhala vatthu vary'aya. Ti etrela ela y'alumiiniyu vaavo kaarinaaka miritti s'opakhirela. Mmalakaru ovolowa vamukhora, ookhala arumari epante ya moonoo woolopwana, ohoolo wene wa etrela. Eyo emphwanyaneya vathi vaya vale. Miyo kihenle vaavo. Khwira, "Nihiku nimoso pooti okumiha-vo. 'Muluku nnaakhala khanrowa orukunxa mutek'ola, masi Owo onrowa omurukunxa mutthu orina muteko.'" Ti yeeyo entthuneya wiiriwa.

²¹ Moone, miyo—miyo koosuwela etthu erin'aka wira, masi nki—nki—nkikhanle wira, nkikhanle wira muhina mwa mukhalelo ory'aka-mo vano. Okhala wira, kihaana o. . . Etthu ehaana wiiraneya muhina mwa miyo, enrowa omwiiriha Muluku wira yeeyo.

²² Hiyo nimphavela otthikela owaani. Anamwane woowunkhela owaani, othene aya antthuna otthika. Tivo kinuupuwelela waattikihasa, Apwiya yatthuna vale, khino numala muteko Saapatu, nto siiso otthika. Okhuma vaavo, nkisuwenle. Masi koosuwela wira emalakaruru etthu iyo wiiraneya muhina mwa miyo, okooniha etthu y'atthu, yoovirikana n'ile kiniir'aka vano. Kaahaakhootta a—atthu, moone, ni nka—nkaatthuna-tho okhala nnaata ni yaawo. Moosuwela enihimy'aka, ale kiniwiihan'aka "riki, riketa," awo yaahikhalana itthu siiraly'aya. Miyo kaahilaleerya n'ixariya yothene, ni Muluku aahilipiherya mwa khula enamuna. "Nto vakhala wira awo khayaatthunne waamini Iyo, vano, mwaahiye mmansaya weso."

²³ Miyo kaarowa osulu iwe, kakhale ni Bud ephovo ela enoorwa, kipacerye muteko osulu iwe. Kilipelele mothakoni, kiihiye maihi aka ni ireru sinnuwe. Ni vakhala wira Apwiya yaamutthuna wira kirowe nipuro pi nipuro, Awo yaamukihimeerya nuulumo, ni miyo kaamurowa kiire.

24 Nto kiry'ene mphironi, kirwaaka nihiku nlo, Awo yaahikeemexa. Vano kaahoona vatthu e . . . etthu kaarweel'aka. Kiri—kiri mphironi kirowelaka etthu ekina vano. Vano khuupuwela, kaphiya owaani, kaamukhalana ele eniihan'ahu ovaanela wa murima ni murima, khino ohela mufiitani, vano nto ni wira atthu yoone mwaha wa xeeni orukunuwa naanaanoru.

25 Vano, nyuwo anamwane, nrowe paahi . . . Nrowe nikhhalane nuulumo naamukhaani na mavekelo.

26 Pwiya Yesu, hiyo ninnixukhuru mwaha w'okathi ula, osuwela wira nithukumanne va, amiravo n'alweene, ni munnuwelo w'eriyari. Ni hiyo noothukumana, epantte ela ya Ehinimala, emaara ekina wira nilavule sa Nyuwo ni sa itthu sikhhanle sa Ekumi ehinimala.

27 Nto aximiravo ala akilante va, ohiy'ula akina w'awo ammalaha osoma, akina aamaliha osoma. Masi kinnoona, Pwiya, etthu emosa yiiraneieyi iwoora vakhani paahi ehinatthi ekumulelo ele yuulupale, ahiiso erumelo ele yuulupale, yaakhumelenle mmyaakoni osulu iwe, onkela epheyo w'oTucson, okathi Malaikha a Apwiya yaakhurunw'aya. Kinuupuwela etthu yaahimmwe, ni—ni vanci-enexa mwaha w'amwaavano. Miyo kinoovekelani Nyuwo, Pwiya, wira munikhaliherye wiiwa saana. Ni miyo kiwerye waahimeerya etthu aximiravo ala, ohiy'ula, enrowa waakhaliherya mmukwahani. Maana, Pwiya, hiyo othene ninniphavela mukhaliheryo owo okathi ula.

28 Munireerihe vamosa. Munilevelele itampi sahu. Ni yakhala etthu niiraly'ahu okhuma okathi nry'ahu va, ehoosivenleni, ninvekela wira Nyuwo munilevelele mwaha wa yeeyo. Maana ninnisuwela, olelo, wira khanirina nro—nrromeliho wa meelo. Khanisuwenle etthu meelo oniruu'aya. Nihaana wiitthokiha olelo wira nikumanane meelo. Ni, Muluku Tithi, eri enamuna emosa paahi ninsuwel'ahu wira yeela, ekhanle, wiitthokiha wira niwooneni Nyuwo, maana orwaaka okathi w'ohoolo ninnisuwela wira hiyo othene ninoorowa wira. Ni nihaana okumana nihiku nlo, hata ni murettele, ntoko mpatthani wala mwaana, wala ntoko nwanani. Ehiireye, Pwiya, hiyo okhala etthu ekina woohikhala an'Inyu Yeenyu oophentiwa. Munivahe itthu iya sinvekel'ahu, mwa Nsina na Yesu. Amen.

29 Olelo, okathi waapah'aka malaxi oonanara, oxaka-ene voosiis'ula, kaahiphwanya nipuro nimoso mBibiliani, kuupuwenly'aka wira yaamukhala etthu yooreera osoma okathi yoola. Ni ti e . . . pooti ohikhala yoophwanelelexa, masi kuupuwenle paahi mwaha wa . . . paahi mi—minuutu vakhani paahi, wira kilavule. Kintthuna kosome yeela okhuma ekapiitulu 18 ya Luka Oowaarya. Anamalepa axexe othene a Ehapari yooreera annilepa yeela. Ekapiitulu 18 ni versiikulu 18.

Mukhulupale mmosa aahimukoha, wira, Mwiixuttihi Ooreera murima, kiireke-ni wira kiphwanye ekumi ehinimala?

Nto Yesu aahimwaakhula wira, Munikiirelalani ooreera murima? khaavo ooreera murima, ohikhanle mmosa, owo ti, Muluku.

Nyuwo munnisuwela sooruma wira, Muhiraruwe, Muhimwiive mutthu, Muhiiye, Muhimootherye mukhw'inyu, Mwaattittimihe atith'inyu ni...ame anyu.

Nto...khwira, Sothene iya kinneettela, ni kinnisuka okhuma enamwane aka.

Vano Yesu aiwaku siiso, aahimwiirela wira, Yohala etthu emosa enoohaleelani: mutumihe sothene...sirin'anyu, mwaakawele alipa-oothoiwa,... munookhalana muhakhu wirimu...murwe, mukitthare.

³⁰ Kinoona wira, nuulumo, *Murwe, Mukitthare*, nlo naamukhala muruku wootepa oreera kikhanly'aka ovaha vaakhanle wira kaalavula n'anamwane ikonto muloko, wala vaakhanle wira kaalavula paahi n'ale anlavulan'aka. Eyo ti yooruma, ni etthu yuulupalexu kinuupuwel'aka wira ootoko ovahiwa mutthu, ni vanci-enexa mmiravo, "Mukitthare."

³¹ Munoorowa omutthara mutthu. Vano, nyuwo paahi... Munooverya wuupuwela yeeyo. Munoorowa omutthara mutthu. Nto moota mummutthar'anyu mutthu, mukupali wira, mutth'ula ommutthara pani. Munnona? Hiyo... .

³² Paulo ootoko ohimya, "Mukitthareke miyo ntoko sinimutthar'aka Kristu." Mwa moolumo makina, "Siiso ntoko miyo sinimutthar'aka Kristu, nyuwo mukitthareke miyo."

³³ Nto vano, wa moonelo yoola woorukunuwa, oka-okathi yoola w'ekumi vaavo hiyo othene oniphiy'ahu. Ni imaara sinciene mookiiwa miyo okhuwelela "riki, riketa," ni itthu siiso. Eyo, ola p'ukathi. Ola p'ukathi hiyo onkhal'ahu. Vekeekahi kahi atthu awo.

³⁴ Atthu awo atthu ntoko hiyo. Anamwane awo ota nno ni ikaaro iya soowuupa saana, aneettihas'aya nno ni nno muramphani, ni yiraka ntoko siniir'aya, yaavuraka asikaro ni omuwurya aalikoro, ni axiruusi ewaraka voohifayi, ni itthu siiso, awo axiruusi ni amiravo ntoko hiyo. Munnona? Awo atthu. Awo anniphenta. Awo annilya. Awo anniwurya. Awo annirupa. Awo annimumula. Awo ahaana okhwa. Awo atthu siiso ntoko hiyo sikhany'ahu. Ni nnakhala vo awo annikhala... .

³⁵ Awo aroovariwa n'irooho yootakhala. Awo khansuwela. Kahi mwaha wa—w'atthu, masi mwaha wo wira, imaara

sikina, muhooleli awo animutthar'aya oniweettiherya ephiro yoonanara.

³⁶ Vano, nyuwo axiruusi n'aximiravo munnisuwela saana. Nyuwo munnisuwela. Muhiixuttihiwa vooreera ovikana yeeyo. Nyuwo murina axitiithi ooreera, miixuttiho sooloka wira muhiire etthu siiso. Munnisuwela saana.

³⁷ Masi awo khansuwela, moone, okhala wira ikereja awo arrow'aya-wo ikereja sa vano, sa naanaano. Ni awo—awo ankhalala mwaha wa nihiku, oosuwelaxiwa. Ni, oh, wulu! Exeeni. . . Ikano sinkhala nneema w'awo. Munnona? Tivo awo, etthu. . . Ntoko sihimaly'aka emaara emosa, mwa musewe kaamonaly'aka ohitto nno, woohikhala khalayi, a Sotoma ni Komora, wira muthiyan'ola aavariwe ni yootakhala aahimwiirela lo—Lothi, “Ele eniihan'anyu yoohifayi, miyo kiiihihana nneema.”

³⁸ Yesu iirale, “Ntoko saary'aya mahiku a Nowe, siiso-tho enookhala orwa wa Mwaana a mutthu.” Tivo hiyo nootthikela nipuro nenlo-tho.

³⁹ Nrowe nimuwehe mulopwan'ola, minuutu vakhani, nisomaly'ahu mwah'awe. Vekeekhai mwanamwan'ola aayariwe etthoko emosa yooreera, ntoko nyuwo axinamwane siry'anyu. Owo aaleliwe n'axitiithi ooreera murima. Okhala wira, yaahooniherya, okathi Yesu omuhimenry'awe sooruma sa Muluku. Owo iirale, “Miyu kinnitthara seiya okhuma enamwane.” Eyo yaahooniherya wira owo aahi—owo aahi— aahileliwa oratteene. Owo khaari oolavalava tu. Ni nyuwo moosuwela, owo—owo aahileliwa wira asuweleke eri yooreera, anamwane ntoko nyuwo othene siry'anyu. Alakela aannunwe vathi va maama ni paapa yaamoova Muluku, wira—wira—wira emwiixuttihe eri yooreera, okathi waary'awe mwanamwane. Ahe, ti yooreera.

⁴⁰ Khino, ntoko mwanamwane, ame awe yaahikhalana ithaama suulupale ya owo okhala mutthu muulupale nihiku nlo. Atithi awe yaahikhalana musurukhu, vaawery'aya omusomihani ni—ni omuvaha esomelo owo aawery'awe. . . aarowaawe okhuma ni esomelo yooreera ni owerya okhala etthu mulaponi. Nto n'ixariya y'ame awe n'atithi awe, emusomihaka mwanamwan'ola, ni khino khuphiyerya okathi awe woomaliherya osoma ntoko nyuwo siry'anyu, moone, okathi owo aaviraly'awe muxikola khuphwanya osoma wawe. Vekeekhai owo khino aari wiisinnuwiha ni otteeliwa murima wa—wa makhalelo a mai ule ni tiithi. Voohihoverya, mahiku ale, owo aahikhalana ikhavalalo sooreera, ntoko nyuwo sirin'anyu ikaaro, ni tiithi ni mai ooreera murima ntoko nyuwo othene sirin'anyu, ankhapelela yeeyo, mookhalana ikuwo sooreera, ni—ni ekaaro, ni pooti. . . ni makhalelo oopuha paahi, siiso ntoko etthu nyuwo sirin'anyu olelo.

41 Nto atithi ni amai ni e . . . evekelaka voohihererya wira—wira mwan'aya ahirukunuwe akhala mutthu pure paahi, wira akhale mutthu oohikhala pure. Axitiithi othene antthuna yeeyo. Moomwiiwa Yesu ohimya yooruma yeeyo, “Mwaattitimihe atith'inyu n'ame anyu,” vano khumaala? Munnona? Ni eyo ti yootthuna ya khula tiithi, owiirela an'aya etthu yoomalela oreera, awo anwery'aya, waasomiha, waavaha itthu khino awo yahaawenry'aya okhalana. Ti siiso kiniwoonel'aka an'aka.

42 Kinoona wira, imaara sikina, orowa oxikola, vano; Kinoona wira, omuroiha Becky ni Sarah ni Joseph muxikola sekuntariya iya ni itthu, weiwo siri itthu iya sothene siniiraneya? Kinnuupuwela wira kinimwaakuxa kaarothe ottuli wa mwaako, ka—kaaleleke weiwo ni e . . . ntoko sinkhal'aya aHinti.

43 Masi va t'ile ekhanle. Ele eri mw'axinamwane enoorowa okhumela ota. Hata wira eri vayi, ehaana, enoorowa okhumela ota. Yakhala yootakhala muhina mmo, enookhumela ota opuwani w'aHinti. Yakhala yooreera eri muhina mmo, enookhumela ota va khula nipuwa. Munnona? T'ile eri muhina mwa mwanamwane, epakeliwo ya mwanamwane, ele eri muhina mwa nyuwo. Ni ele nyuwo mukhanly'anyu vano alakela ti yeeyo munrow'anyu okhala makhalelo anyu othene. Nyuwo muri nipuro n'orukunuwa.

44 Moosuwela yeeyo? Ipursentu miloko mithanu na miraru ni thanu na mosa s'atthu oorukunxa murima erowaka wa Yesu Kristu siniiriwa sihinatthi ophiya iyaakha miloko miili ni mmosa. Eyo ennoniherya. Iyaalikelo sinnooniherya. Ipursentu miloko mithanu na miraru ni thanu na mosa anrwa wa Kristu, anrwa ehinatthi ophiya iyaakha miloko miili ni mmosa. Nyuwo, numala ovira iyaakha seiyo, munkhala oolikanyiheya wala oovarelela iphiro sanyu. Oh, vanniweryaneya, vekeekhai. Awo anoorwa, iyaakha, miloko mithanu na miili, miloko mithanu na miraru, masi ti yoorikarika. Munnona?

45 Nyuwo muniipaka mury'ene mmiravo. Munikhalana ithaama sanyu wa ele entthun'anyu wira, ni etthu munthun'anyu ophwanya mwa makhalelo. Munuupuwel'anyu. Nto muupuwelaka vale, vekeekhai, muupuwelo anyu, eyo eniruhiwa mmuupuweloni mwanyu ni etthu ehinsuweleya eni—enixintta muupuwelo anyu. Vano nto okathi enkhal'aya mmuupuweloni mwanyu, vano munoolavula, wira munrowa wira yeeyo. Vano nto ithaama sanyu sinooweetiheryani yeeyo.

46 Tivo, amai n'atiithi, enwehereryaka mmirav'ola . . . ithaama sawe okhala suulupale; musurukhu oniphiererya opaka. Vano nto, vekeekhai, yaahivekela wira mwa—mwammirav'ola akhalane—akhalane mureerelo yoowo. Moone, awo—awo yaahiira sothene saawery'aya wira. Owo khino arine-ene ikhavalalo sooreera, ni—ni khino aari oosuwelaxiwa eriyari y'athiyana.

47 Ni ele yaarowa w'alopwana, yaamukhala y'athiyana, ninno ninno, moone, 'okhala wira ninlavula mwaha w'ekumi y'atthu, minepa, oowanli alopwana n'athiyana.

48 Vano nto, nuumala mureerelo ola wothene mmirav'owo aarin'awe, moone, owo aahikhala a "makhalelo a othaaciri," ninihan'ahu, nipuro nimosa owo ahaarin'awe ovelavela vanci-ene. Axitiithi awe yaahikhalana musurukhu. Owo aahikhalana...Owo khaareere okhala...Owo aahikhala mukhulupale. Biblia onnihimya yeeyo va, ya e...ntoko mmiravo, mmiravo thaaciri mukhulupale. Ni hiyo ninnoona e...Mw'emiravo, khino ary'ene eyinnuwelo awe y'emiravo, amalakaru okhuma oxikola, amalakaru omaliha osoma, khino, isumana vakhani ahinatthi, wala etthu siiso, owo aahikhala... Owo aari mukhulupale, ni aahikhalana sothene mirima saakhanly'aya otthunaka.

49 Nto mmirav'owo khaari riki a naanaano. Owo mwanamwane mmosa ooloka. Kookupali wira, okathi Luka olempy'awe yeeyo, wala Marku, kookupali wira aari yoowo, Yesu aahimuweha khimusivela, okhala wira Owo aanimphenta. Munnona? Yookhala etthu mwaha wa mwanamwane. Waahikhala omutthu wooreera waapathhanihiwe ni mwanamwan'ola. Owo aakhumme yayi? Vatthokoni vooreera yaamwiixuttihale sooruma sa Muluku, ni khooniwa wira aaneettela seiyo. Ni owo aaneettela, okhuma enamwane awe.

50 Nto mmirav'owo aahikhalana ethaama; owo aatthuna Ekumi Ehinimala. Owo khwira, "Mwiixuttihi ooreera murima, kiireke-ni wira kipwanye Ekumi Ehinimala?"

51 Moone, mwa sothene sirin'anyu mulaponi, nlelo munepa muhina mwa nyuwo onnooleelani wira yookhala etthu emphavel'anyu, muhirin'anyu. Ni muhakhu paahi...Ahiiso, khivantthuneya kweekwe okhala muhakhu. Vaamuweryaneya okhala, osuweliwa, mwaaruusi mmosa ooreera, owo ookhalana oreera wawe okhanly'awe wupuwelaka. Khino owo t'osuwelaxiwa oxikola. Khino mmiravo onowerya okhalana khula mwaaruusi onimutthun'awe. Owo onona wira ti mmiravo oolipalipa. Iwo kuhiyo olipalipa. Eyo enoonyaala siiso ntoko ithutu mmatta. Munnona? Enoorowa. Khivanrowa opisa. Irukunuwelo vakhani paahi sa nsuwa, eyo yoorowa, vano mookhalana munepa orina okhala Voohimala.

52 Nto mwanamwan'ola khino aahikhalana omutthu wooloka, okhala wira aahiisooniherya mwaneene wa Pwiya Yesu, asuwelaka wira aahikhuna nikutha nawe. Owo khwira, "Mwiixuttihi ooreera murima, kiireke-ni wira kikhalane Ekumi Ehinimala?"

53 Owo khwira, "Munikiirelelani ooreera murima," khwira, "musuwenle-ene wira ori Mmosa paahi ooreera murima, ni owo ti Muluku?" Munnona? Exeeni mmirav'ola aahimaly'awe mwa

yeela? Wira Owo aari Muluku. Munnona? Owo khwira, “Nyuwo munnisuwela sooruma. Mweetteleke seiyo.”

Khwira, tivo owo khwira, “Sooruma xeeni, Mwiixuttihi?”

⁵⁴ Owo khwira, “Sooruma sa ‘waattittimiha atith’inyu n’ame anyu,’ ni sikina.”

⁵⁵ Owo khwira, “Eyo miyo kinniira, okhuma emiravo aka. Moone, kinniira eyo.”

⁵⁶ Owo khwira, “Nlelo yookhala etthu emosa enoohaleelani. Murowe, mwatumihe sirin’anyu, mwaavahe alipa-oothoiwa, murwe mukitthare.”

⁵⁷ Oreeriwa xeeni! Vaamuweryaneya owo okhala Petru, Yakopo, wala Yohani, mmosa wa yaawo. Moone, mwanamwan’owo aahixuttihiwa ni aahileliwa oratteene, khuruhiwa wa Kristu, wira amurumeele mwa iwerelo sothene owo aarin’awe mwa yoowo, wira arumeele, alakela oosoma, mmiravo, thaaciri, ovara murima, vaavo owo aakhanly’awe wooniherya Ehapari yooreera, nave nlelo khukhotta Yeeyo. Etthu—etthu xeeni y’elolo yaary’aya wa mmirav’owo! Munnona?

⁵⁸ “Mukitthare.” Vano, moone, owo aahaana omutthara mutthu. Vano, owo aahaana otthara ovara murina w’atthu aapatthanan’awe, ovara murima wa mwali mmosa, ovara murima wa nikhuru n’aximiravo owo aapatthanan’awe, axirikh’awe oxikola, wala omutthara Yesu Kristu. Mwa oreera wawe murima wothene, nlelo owo aanisuwela wira khaarina Ekumi Ehinimala.

Anamwane, ti yeeyo murin’anyu otthokelela. Munnona?

⁵⁹ Vano nkanweheni mmiravo ene ohiy’ula, etthu aakhanly’awe okhalaka, ni etthu okhanly’awe, etthu owo okhanly’awe ohiy’ula. Owo ori nipuro nlo. Owo aari mutthu. Owo ori nipuro nlo. Owo onlipelela Olamuliwa. Owo onlipelela okumanana Olamuliwa Nihiku nenlo, okhootta oreeriwa omosaru muniruuheliiw’anyu nyuwo anamwane, voohalela okhala enamuna emosaru yeeyo; anamwane ooloka, omutthu wooloka, axitiithi n’aximai ooreera murima, murin’anyu, khamurina ovaraka muteko ’voohikhala wira munootthuna. Munnona?

⁶⁰ Masi yookhala etthu ekina emphitaana ni yeeyo. Yookhala etthu emphitaana ni yeeyo. Masu awo, ohiy’ula, khankhwa. Nlelo muthuramulo wa khula mmiravo, khula mwaaruusi, “Mukitthare.” Munnona?

⁶¹ Masu khankhwa. Khula okathi munlavul’anyu etthu, muupuwele paahi, nkhamu mukaaroni mw’anyu wiiphiini, nkhamu vapulpitu, nkhamu ohitto vanlothoni v’ephiro ni amposi anyu mulopwana wala mposi muthiyana, nipuro ti nipuro, eyo khenikhwa. Ni—nihaana okhala voohimala.

62 Okathi waamoonaly'aka mwaaruusi ule miyo. . . ohiyu uwo mwa yoowoona, mwaaruusi mmosa oreera saana, muratti a Hollywood, ni khumoona akhwaaka, aphiyaka, atthunaka ophwanya mukhaliheryo. Owo okhwiye mwaha w'ekusakeryo ya murima, Mwali Monroe. Vano nto soovira iyaakha piili, ni miyo kaahimoonaa akhwaaka. Vano mahiku maili ohoolo waya owo khukhwa.

63 Vano, ohiyu uwo, kaahiiwa nsu na mwali ule. Sayi? Anamwane yaamukileela, "Paapa, nyuwo munrowa Mur'ole Ohintthikiwa, okathi wothene." Khwira, "Wookhala othweela ntoko yoowo onrwa, olelo ohiyu." Khukileela ohiyu umosa waarow'aya okhala, esumana emosa wala piili ohinatthi ophiya okathi. Miyo khuupuwela, "Ahe, kinthuna koone yoowo, 'okhala wira kaahikhala ohitto wa muro yoowo, imaara piili wala tthaaru; voophiyaka imaara xexe, woona waka." Ahe, miyo—miyo kaatthuna woona.

64 Nto Mwali Marilyn Monroe khuthweela yeeyo. Ahe, owo aari mwali kaamoonaly'aka mwa yoowoona. Nto aaphwanyaneya vaavo, mw'elatarato, ni miirelo, mwiirelo ene owo aapakaly'awe mwa *Muro Ohintthikiwa*, okathi okumihenry'awe elatarato ele, khino iyaakha muloko ni thanu khalayi. Yaari elatarato ya khalayi, khino iyaakha miloko miili sivinre. Vano owo ohookhwa soovira iyaakha piili. Vano ole ori-tho vale, mukumi, khula eyiirelo ni khula nuulumo. Munnona? Nlelo ti yoovariwa mufiitani ya makineeti mpakha ekhanly'aya-tho ekumi.

65 Kahi yeeyo paahi, masi sothene hiyo nnihimy'ahu ti sookhala. Khula nuulumo ninlavul'ahu khanikhanle okhwaaka. Moolumo anoovira musaala mu naanaano va, mikhalelo s'atthu. Televisawu enoottotta. Nyuwo munoowerya olavula vaava, nto munimwiiwiwa mulaponi mothene, esekuntu yeeyo. Hata nyuwo muhinatthi wiiwa musaala mu, nlo ninrowa molumwenkuni mothene, ni iletroniku.

66 Ni eteela yuulupale ya Muluku enookuxa eyo. Ni khula wiitikinya ni khula eyiirelo mumpak'anyu, muhaana okumanana Wolamuliwani. Munnona? Tivo, mpatthani mmiravo, etthu yooreera ohiya, wuupuwela itthu iya, moone, 'okhala wira munoorowa okumanana-tho. Munnona?

67 Nrowe nimutthare mmirav'ola, oreeriwa aarin'awe, nto mwiihele voopuroni vawe. Ni mwaaruusi, siiso ntoko siry'aya Becky ni Marilyn, siiso ntoko vamosaru ntoko mwaarowaanyu okhala voopuroni vawe, ni mwaamuwerya wiiwa Nsu nlo nlelo nri nikumi.

68 Nlo nlelo nikumii. Nlelo nnimweetteetta. Siyensiya onihimya wira, "Iyaakha miloko miili okhuma vano, ninoophwanyiwa Nsu Nawe nekeekhai Owo aalavunly'awe, iyaakha ikonto piili sivinre." Nlo nlelo nikumii. Ntoko nsorosoro nimmorela

mphareya, mawimpi khammaala. Nlo ninoorowa okerekhere wa pahari, imiilya ikonto sene, n'utthika.

⁶⁹ Nsu namalaru olavuliwa vanlakani siiso so, nlo khaninkhwa. Khiivo hat'etthu mukhanly'anyu ohimyaka Woolamuliwani. Nri weiwo tu. Ninoorowa okhala Nsu na Yesu Kristu nimulattulaka mmirav'owo, "Mukitthare," ni owo akhoottaka, vateelani, ooxanka-ene, okhala wira aahikhalana mireerelo sinci-ene. Munnona? Hiyo pooti hata ohikhala. . . Kahi wira kweekwe ohaana okhala musurukhu. Pooti okhala itthu sikina. Munnona? Etthu p'itthu hiyo nimphentex'ahu ovikana wiihaniwa iwo, moone, enkhalo ntoko musurukhu wa hiyo. Enkhala etthu ennootha.

⁷⁰ Vano nrowe nimutthare vakhani. Exeeni yaakhumelenle okathi orukununw'awe khurowa? Owo khaaiwelenle Nsu nle na Kristu. Owo aaronwe n'apatthani awe.

⁷¹ Yeeyo, nyuwo anamwane, nyuwo othene mw'anamwane ooreerasa murima, ni muhaana okhalana apatthani, masi nweheke enamuna xeeni ya mpatthani murin'anyu. Mpatthani uwo aamuttharaka Kristu, mweettaneke mpatthani uwo. Mmutthareke Kristu, nave. Masi aahimutthareke, muhiire.

⁷² Nrowe nimuwehe yoowo. Hiyo ninnoona wira, khino owo aahikhala n'apatthani awe. Aahikhala mukhulupale muulupale. Owo aari mukhulupale okathi uwo. Ohoolo waya, ninnimuphwanya ooruwerye-ene mpakha wa—wa—waarin'awe oteka matatha makina wira apweheke-mo itthu sawe. Vano nto owo khwiira mmansawe, nuumala wuuluvala, ni ovelavela wa makhalalo eemiravo ni itthu saahimala, sothene siiraly'awe, khino, waari orukuneya.

⁷³ Okathi mulopwana mutokweene wala muthiyana mutokweene, ntoko miyo, amwaar'aka, ame anyu ni atithi anyu, ti voorika okhala etthu anupuwelel'aya. Khanwerya, khandthuna okhuma ni—ni weettakasa nno ni nno muramphani, moosuwela, ntoko—ntoko yaarow'aya wira amiravo, n'axiruusi. Ivarihanelo, ni t'ani onrowa okhala mwaar'inyu wala iy'anyu, wala, moone, awo kharina iyo mmuruni mwaya. Awo, awo aakhalana aana, awo t'ocaliwa. Eyo munrowa okhala nyuwo othene, meelo, wakhalaru meelo. Munnona?

⁷⁴ Nto mmoone mmirav'owo, nto, ni khino. . . Khino owo khaatonko hata othela. Ni, nnakhala vo, owo aari mukhulupale muulupale. Nto owo aakilanthe va. . .

⁷⁵ Ni ntoko sinkhal'aya oYerusalemu, nlelo, olelo, awo anlyaasa vataratoni, okathi ula wa nihiku, wakhala wooriirya, ota ohiyu.

Ni ninnimoona mutthu mukina onooniheriwa vamosa ni yoowo: mulipa-oolola.

⁷⁶ Nto mulopwan'owo, mwaha w'oleliwa wira—wira omuttittimiheke namwaattamanani, ni owiirela akina ntoko

akina aniwiirel'ayani. Moone, mwaha w'okhootta wiihana iwe wa Kristu, vookiserya . . . Enkhala ntoko, mmiravo oleliwe-ene etthoko emosa siiso, eyo khiyaakhalakhala emuhiyaka, masi yaahimuhiya. Yaahimuhiya.

⁷⁷ Nto vale aaniphwanyaneya mulopwana mmosa vamukhora, iihaniwa Lasaro, aamulolela yolya, nave mahale-ene. Owo aahaana olya itathela owo aavel'awe, hata woohikhala sa mulipa-oolola, masi s'alapwa. Ni khaareerane makhwatta. Masi mulopwan'owo khaareere okhala oohononeya mmawaani, okathi uwo, owo khaarina-tho othunku. Aahikhala oowuuma murima, okhala wira aahikhootta yoovaha ele ya Kristu.

⁷⁸ Ni khino ohiyu umosa, okathi yoola, apakaka itthapelelo sawe ni iviinyu sooreera, ni axithiyana oophenteya, oowarasa maniya, emurukurenrye-ene, ni itthu siiso, ni sothene murima awe saakhanly'aya otthunaka, ni itthapelelo. Mulipa-oolola ary'ene vamukhora.

⁷⁹ Nto vahinatthi oxa, voosiisu aya, owo aari omooroni, anelaka wira Lasaro yoole arwe ahele maasi vanlumini vawe. Erukunuwelo ya sookhumelela.

⁸⁰ Nto nwehe, okathi iiraly'awe, "Tithi Abrahamu," vano, owo nlelo aanuupuwela wira Abrahamu aari tiithi a aYuta. Owo khwira, "Tithi Abrahamu, mmurume mulipa-oolola yoole Lasaro akhuruwele nno ni maasi vakhaani mukathani mw'awe, ahele vayanoni vaka. Malumi a mooro ala anookihooxa."

⁸¹ Nto owo khwira . . . nto Abrahamu khwira, "Ti, nkinwerya wira yeeyo," mwa moolumo manci-ene. "Ni ohiya vo, moone, mwaahikhalana okathi anyu mw'ekumini."

⁸² Aarina liini? Okathi Yesu iiraly'awe, "Mukitthare." Masi owo khukhootta. Owo khutthara ephiro aakhanly'awe ophwanyaka musurukhu. Vano eyo eri saana, khiva mulattu ophwanya musurukhu, masi mmutthare Yesu mwiraka siiso. Munnona? Nto owo aahirowa ephiro ekina, ni mittitthi s'atthu.

⁸³ Nto munnoona wira, owo iirale, ni Abrahamu iirale, "Ni ohiya vo, nookhala nlitti noowiixa nuulupale eriyari ya nyuwo n'uwo, nenlo ohikhanly'awe hata mutthu onwerya olapuwa, ni ohinkhalakhal'awe alapuwaka. Ale ari iwo khanwerya orwa nno, ni ala ari nno khanwerya orwa iwo. Nookhalihwiwa. Khaavo mutthu otonko olapuwa wala onrowa olapuwa."

⁸⁴ Vano nkamwiiweni. Owo ontthuna okhala namalaleya okathi uwo. Wiihana Yesu aamwiireny'awe, wira—wira amutthare Yoowo, aarin'awe, ni okhala namwaaruuha atthu, ntoko mmiravo, waahimutthikela-tho. Owo aahuupuwela, wira aahikhalana axinna athanu, ni ottuli elapo ya vathi, ni khaathuna yaawo nipuro nenle.

⁸⁵ Owo khwira, “Mmurume Lasaro, nto, atthikele aaleele axinn’aka wira ehirwe ephiro yeela.” Mwa moolumo makina, “Ekupali wihaniwa wa, ‘Mukitthare.’” Munnona?

Masi owo khwira, “Awo, khanrowa wira.”

⁸⁶ Owo khwira, “Ayo, aakhanle mmosa aarowa ohihimuwa w’alipa-ookhwa, ntoko Lasaro, khurowa waaleela.”

⁸⁷ Moone, eyo enooniherya wira, nakhwa vale, nlelo munkhala musuwelaka etthu. Owo aahuupuwela. Abrahamu khwira, “Mwan’aka, muupuwele, mahiku anyu.” Munnona? Nlelo munnuupuwela. Khamunipwetexa muupuwelo anyu. Munnuupuwela.

⁸⁸ Ni miyuupuxeryo mulopwan’owo aawery’awe okhalana, ni nlelo nipuro nenlo, aahuupuwela oreeriwa aarin’awe wo omwiiwa Yesu iiraka, “Mukitthare.” Masi owo aamutthanre mutthu oohiloka, muttitthi woohiloka. Owo aakenle mmuttitthini woohiloka, khurowa nipuro noohiloka, khumalela wa Yoohimala yoohiloka; khukhala oomalamalihiwa Nihiku nenlo, wa Muluku mahiku othene.

⁸⁹ Yesu nave-tho oohimya nuulumo nimosa nuulupale nooxankiha, “Hata akhalaka mutthu onihihimuwa w’alipa-ookhwa khutthika, nlelo awo khanrowa okupali. Okhala wira, awo aakhalana ikano sa Moise, ni awo yaahitthune wiiwelela seiyo, weso khanrowa wiiwelela hata akhalaka mutthu aarowa ohihimuxiwa w’alipa-ookhwa. Awo khanrowa okupali.”

⁹⁰ Mwaha wa xeeni? Mwaha wa xeeni? Ikano saanihimya etthu ntoko yeeyo? Ayo. “Muwiirele akhw’inyu ntoko sintthun’anyu wiireliwa.” Ni owo aahikhala vathi va ikano. Masi aahimuhiya mulipa-oolola okhwa vamukhora. Munnona? Owo aahi—owo aahikhala vathi va sooruma sa Muluku, nave nlelo khuvonya woona Ekumi ile yuulupale Ehinimala.

⁹¹ Anamwane, nyuwo, khula mmosa, onkhala ntoko awaka. Nyuwo, khula mmosa, onkhala ntoko an’aka athiyana n’alopwana. Mwa enamuna emosa, nyuwo mwa yaawo, moone, naalavulaka sa erooho. Ti yeeyo. Apwiya Muluku aa—aahela minepa sanyu wira kikhapelele, okhala wira nyuwo munnoorwa, okiiwa. Munnikaamini. Munnona? Nto mwa ehimeryo emosa ya nuulumo, nyuwo mwa an’aka alopwana n’athiyana. Ti yeeyo.

⁹² Kweekwe muupuwele, weettela sooruma sa Muluku etthu yuulupale. Oleliwa etthoko yooreera ti yoorithi enkhuma wa Muluku. Ni okhala anamwane ooreera ni omutthu ntoko sirin’anyu, oreera. Yooreerexa, okhalana esomelo. Ti yooreerexa hata okhala elapo ela yootaphuwa. Hiyoo nookhalana itthu sinciene wira nixukhuru.

⁹³ Masi yookhala etthu emosa nyuwo muhinrith’anyu. Muhaana okupali Yeeyo. Eyo Ekumi Ehinimala. Ni munrowa

wira siiso mwa omuthhara Yesu, mwa musuwelelo w'oyariwa vasya. Muhikhale oohicala yeeyo.

⁹⁴ Ehantisi yaamukhaani kiiwaly'aka emaara emosa, ya mulopwana mmosa aari, oh, owo aari masikhini. Ni owo—owo kweekwe aatthuna o...Eyo ehantisi ya malavi, ntoko. Eyo kweekwe ennikipharelela, nnakhala vo. Nto nihiku nimosa owo aattontte nluwa. Nto nluwa naari na maxiitta, ni nluwa khumwaakhula, khwira, "Nyuwo mwa masikhini okhala wanyu wothene." Owo khwira, "Vano nvekele entthun'anyu, nto munoovahiwa."

⁹⁵ Owo khwira, "Mwaak'ole iwe onootthukuwa, ni kaamuwerya ovolowa muhina kiphwanye eweero muhina mwa mwaako."

⁹⁶ "Ahe," owo khwira, "muhaana okikuxa miyo mapuro othene onrow'anyu. Munnona? Muhaana okikuxa ni nyuwo. Tivo, mapuro othene kinkhal'aka, vano nvekeleke etthu entthun'anyu."

⁹⁷ Owo khweetta akelaka mmwaako, nto mwaako khutthukuwa, vano owo khuvolowa. Ixitante saasareiyi eweero ni maluku oowaarya, ntoko ehantisi ya malavi enihimy'aya. Owo khupweha nluwa vathi va—vameesa, ahiiso, nluvu. Nto owo khutthimaka khukuxa nniya nuulupale, nto owo khwira, "Kihaana orowa owooniha yeela apatthani aka. Nto vano ka mutthu thaaciri. Kookhalana sothene vano. Kihaana wooniha yeela."

⁹⁸ Vano nto nluwa khulavula, "Masi," khwira, "mooliyala etthu yuulupalexa."

⁹⁹ Vano owo khutthikela ottuli khukuxa, khwira, "Ahe, khino kino—kinookuxa nipattuuxa na eweero. Kinookuxa nipattuuxa na eparatha." Nto siiso owo khwira, "Kini—kinimwaakuva kikhume, kaaleele atthu moota ory'aka thaaciri, ni sothene kirin'aka."

¹⁰⁰ Vano owo khuphiya vamukhora, nto nluwa khwira, "Masi mooliyala etthu yuulupalexa."

¹⁰¹ Vano owo khutthikela-tho ottuli. Owo khwira, "Mu ninniphwanya mithinto sothene sa ikaruma." Vano, owo khuttotta nluvu. Owo khwira, "Kinoorowa, kikuxe nluvu nla kawoonihe atthu muthinto xeeni wa nluvu mwaak'ola opakaniw'aya, wira kiphwanye ephiro aka yoookolowa." Munnona?

¹⁰² Vano owo khupacerya okhumela vamukhora, nto nluwa khwira, wa e...owo okathi wookiserya, "Mooliyala etthu yuulupalexa."

"Oh," owo khwira, "oh, mmaale."

¹⁰³ Moone, owo khaatthuna wiiwa-tho nenlo, "Mooliyala etthu yuulupalexa," khutthyawa akhumelaka vamukhora. Nto

vairaly'awe, mukhora khuwaleya ottuli wawe, ni nluwa muhina. Ethhu yuulupalexa naari nluwa. Munnona? Ethhu yuulupalexa naari nluwa.

¹⁰⁴ Iyaakha sivinre, ntoko mwanamwane, ntoko nyuwo othene muris'anyu, va, woosukihani inyompe nno, osulu wa Phoenix. Kaasoma nipattuuxa, na ophavelasa, epaphelo yaahimya mwaha wa namaphavela. Nto, khiyaakhanle arampha yaavira nno okathi uwo, mip hito mikhaani sa mithaaka paahi. Nlelo sinniphavelasiwa vanci-ene nno, moosuwela.

¹⁰⁵ Masi namaphavel'ola aahikela, ni aahiphwanya musurukhu munci-ene, eweero yinci-ene. Nto okathi waarow'awe, owo khukhala mmuxaaxani owo aaphwanyaly'awe. Ni aahikhalana mwalapwa, nto, mwa—mwalapwa, khutthukeleliwa vate. Nto ohiyu yoole, aahikhala namatuphela aamutthara, wira akuxe eweero yeela. Owo aaphwanyale mmikotini sa khalayi sa oSpaanya, vano owo aamoorwa ni yeeyo. Vano mwalapwa khupacerya okhuwela.

¹⁰⁶ Nto mulopwan'owo khaatthuna ohaaxiwa ni mwalapwa ole. Owo khwira, "Omaale." Owo khwira, "Meelo, kinookuxa ela, ki—kirowaka opooma." Ni kino. . . Ekano ya ehantisi yaari ila. "Ni kinoorowa ophimiha, ni kinookhala thaaciri. Ni kinoothuma ikaaro suulupale. Ni kinookhalana inamuna sothene s'athiyana ni maira maalupale. Ni kinookhala mutthu thaaciri, okhala wira kookhaliha soohimya. Kookhalana eweero ene va, yinci-ene." Nto khwira, "Kino. . ."

¹⁰⁷ Nto okathi aatthun'awe orowa orupa, mwalapwa khukhala akhuwelaka, okhala wira mwalapwa aahimoona namatuphela arwaaka, aitaka, amulipelelaka namaphavela orowa orupa.

¹⁰⁸ Owo khuvenya-tho, khimuulumela-tho mwalapwa, khwira, "Omaale." Vano mwalapwa owo owooniha othunko aahitthuna omulopola pwi'y'awe wira ethhu yoowoopiha yaamwiipitha—yaamwiipitha. Nto okathi owo. . .

¹⁰⁹ Okathi mukina, mwalapwa n'upacerya okhuwela, namaphavela aahikhalana kapwitthi. Owo khaatthuna ohaaxiwa, tivo owo khuvenya khumoopela mwalapwa. Vano namaphavela khwiiviwa ohiyu yoole, ni namatuphela. Sooloha sawe sothene soowupuwelela khisaamwiirihale ethhu yooreera. Mwaha wa xeeni? Owo aaroomaaliha nsu naamulopola.

¹¹⁰ Khaavo mutthu okhanle otthunaka wira ethhu, nyuwo anamwane, khaakhalakhala aweryaka wira ethhu yoovonyeya, nuumala oleliwa enamuna sileliw'anyu, vahikhanle wira mwaamoona ethhu wooleelani wira muhiire. Vano, muhikhalakhale mmaalihaka nsu nlo ninoolopolani.

¹¹¹ Nto okathi wothene muupuwele, mukupali Nsu nlo nihimyaale wira, "Mukitthare," ni okathi wothene munookhuma saana. Kookupali wira munookupali. Miyo kinnoororomelani.

Masi okathi wothene muupuwele paahi wira Yesu, Nsu nenlo, ori mukumi elapo ya vathi ohiy'ula.

¹¹² Vamosaru siiso, ntoko khula nsu ni khula nuulumo hiyo nilavunly'ahu nlelo nikumi, okathi nsu nlo ninkhum'aya muniwimpini mmo n'ephaka musulu. E. . . Moone, mookhalana ekaruma emosa emmwarya nno eniroiha ota. Nyuwo mwa namamwarya muniroiha ota. Vano entthuneya estasawu wira nikuxe.

¹¹³ Ni Yesu aari Namamwarya a Masu a Muluku, maana Owo aari o—oraaru wa Muluku wooniheriwe mwa Mutthu mmosa. Owo aari Muluku oomalela ni Mutthu oomalela.

¹¹⁴ Ni oraaru wa Muluku, oraaru wa mikhalelo sa Muluku, okhala Tithi, Mwaana, ni Eroho Yowarya, waahooniheriwa mwa Mutthu mmosa yoowo, Yesu Kristu. Tivo, vo, Owo aari Masu.

¹¹⁵ Ni Owo aari Namamwarya iirale, "Ole oniwa Masu Aka, ni onimwaamini Ole okirumme, ookhalana Ekumi Ehinimala." Munnona? "Vekeekhai kinoohimeeryani wira, ole oniwa Masu Aka, ni onimwaamini Ole okirumme, ookhalana Ekumi Ehinimala." Vano, Masu awo yaakumiheriwe ota ni Namamwarya. Owo aahihimya, nihiku nimosa wira, "Vekeekhai kinooleelani wira, mwairela mwaak'ola, 'Othaamevo,' muhihoveryaka mmurimani mwanyu, masi mwaaminiki wira ehimaly'anyu enimwiiraneya, munimwaakhela ele ehimaly'anyu."

¹¹⁶ Vano, mwawerya—ru paahi okhala estasawu wira mukuxe Yeeyo, ni eyeettiheryo emosa muhina mwa nyuwo, mwaha wo waamini, enimookelihani naanaanoru muntthekoni na Muluku, mwa Oyariwa vasya, ni oyariwa vanenli. Vano okathi wothene munookhala voophitaana, wira mwiiwe Nsu nenlo ninrowa woolopolani okathi wothene ehasara enkhal'aya vakhiviru. Itthu saahikhale saana, siheettaka saana, Nlo ninrowa okhala noolopolakani okathi wothene. Vano nto, ohiya nihiku nimosa okhala ntoko mmirav'ole thaaciri hiyo nnimuhimy'ahu; mukhale mulopwana ntoko murummwa Petru, Paulo, wala mutthu onaaroiha atthu wa Yesu Kristu. Nyuwo mwiireke siiso, anamwane.

Ninoowerya ovekela?

¹¹⁷ Pwiya Yesu! Amwaavano, alopwana n'athiyana a meelo, wakhalaru meelo. Hiyo nihaana waaxuttiha, Pwiya. Ninnoona okhalana muritti uwo, wo waaxuttiha ntoko wira onookhala meelo. Waahikhale, nto olelo ti nihiku.

¹¹⁸ Vano nto, Tithi, hiyo noosuwela wira khaavo ori ookupaliwa vamaithoni Vanyu. Khaavo mutthu okhanle wiivuwihaka. Hata osoma, sinamwi itthu iya sikhalaka sooreera, hata miteko sooreera, hata mwaalaano w'etiini, hata pisikoloxiyya, khiivo hat'etthu enwerya omulipiherya Muluku ehikhanle Eroho Yowarya. Eyo ti Ekaruma, Muluku Mwaneene, mwa mukhalelo

wa Ekumi Ehinimala, enwerya orwa wa hiyo ntoko mutthu mmosa. Ni hiyo ninnixukhuru mwaha wa yeela.

¹¹⁹ Vekeekhai ehoonihereya okathi Petru aahimaly'awe. Yesu aamwiireny'awe, "Kahi erutthu n'ephome ewuupululenedeni yeela nyuwo. Khamunatoko wiixutta oseminaariyu. Khamunatoko wiixutta yeeyo oxikola." Eyo etthu ya mutthu mmosa, etthu emosa khula mutthu orin'awe waakhela. Nyuwo mwiirale, "Vamwala va Miyo kinooteka-vo Ekerej'Aka, nto mikhora sa mookhwaani khasinwerya oxintta." Hiyo ninnixukhuru mwaha wa yeeyo, Pwiya.

¹²⁰ Nsu nenlo nlelo nikumi ohiy'ula. Ni nlelo sookhala istasawu, istasawu s'ottaiwene, istasawu sa wiiwa, istasawu so waakhela, sa waamini, sinwerya okupali Nenlo. Hiyo ninvekela wira khula mmosa w'axinamwane ala yaakhele Nenlo, Pwiya, mmurimani mwaya. Ni yuupuwele wira, kahi ele aniir'aya wira ekhale ooreera murima, masi awo. . . Muluku khannilamula mwa ele eniir'ahu, masi mwa ele ekupanly'ahu. Hiyo ninoopoliwa mwaha wo waamini wahu, nave kahi ni miteko sahu. Vano hiyo ninvekela, Tithi a Wirimu, wira awo evare eyoonelo vano, ni yoone ni yiwe olattuliwa iwo wuulupale Woohimala, wa "Murwe, mukitthare."

¹²¹ Khula mmosa a yaawo, Pwiya, ahiye itthu sothene sa molumwenkuni, ekumi ila, enikhwa ya maroso. Ntoko awo ary'aya va ohiy'ula, ni maihi aya ootteela a eweero, ni akina aya ni maihi aya ooriipa, ni maitho ooriipa, ni maitho ooripelela, ni akilante vootepa waya oreera wa ele awo anrow'aya okhalakhala ekhalaka.

¹²² Ni ntoko namalepa muulupale sihimaly'awe, "Mmuupuwele Mpattuxa anyu mahiku eemiravo anyu, ehinatthi ophiya mahiku ooriipiha murima. Vano khamunrowa ophwanya opuha mwa yaawo." Moota, Pwiya Yesu, Nyuwo mwaamuhimenry'anyu Petru, "Mwaaryaanyu mmiravo, mwaanivenya khuyarowa waatthunaanyu. Masi okathi onuuluval'anyu, mutthu onooroihani ohintthunanyu-wo." Mwaahiye yuupuwele, "Vano ti nikhante nihiku nene. Ola p'ukathi." Munivahe, Tithi.

¹²³ Miyo kinnivekela ottikihiwa khula mmosa a awo, ntoko mwan'aka yoomi, va ohiy'ula, wa khula mwaana mpaani mu. Kinnoona wira Nyuwo moohela mmatatani mwaka, waakhapelela. Miyo kinnivekela ottikihiwa othena aya, okhuma wa Satana ni okhuma mookhwaani, ekele mw'Ekumini mwa Yesu Kristu. Amen.

¹²⁴ Mureerihwe, anamwane. Ti vooreera saana woohimeeryani moolumo kamosa-kamosa. Ni miyo kinootthika, Billy. Anamwane ooreera, munnikisivela. Munna Fred, Apwiya yooreeriheni. Apwiya yooreeriheni, munna.



MURWE, MUKITTHARE EMK63-0601
(Come, Follow Me)

Mutthak'ola wa Munna William Marrion Branham, opaceryawene olaleeriwe ni Enkelesi Esaapatu ohiyu, mahiku yeettaka 1 mweeri wa Junho, 1963, va Muthukumano wa Mpaani oTucson, Arizona, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2020 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org